

broder de vyffte krech Godeke van der Tynnen und er name hette Pelme

Item Hinrick de krech Johan Drostens dochter Kunneken er moder hette Wabele de hedden dre Sonne und veer Dochter de sonne hetten Arndt Johan und Alhardt de eyne dochter hette Styneke Aleke Anne und Neze Styneke wordt gebracht tho Sunte Walberghe Anna tho sunte Egidii Nese vorth thon Nysinck gebracht Aleke wordt beraden an Johanne den Bucke Item Henrick van Drolshagen de vermerde syn guydt und hadde alto grote last dat he syne suster bereidt Item den susteren wordt mede geven eyn guydt hoff Vorberynek genompt und Grolle Se kregen van myner moder bruytschatte sesshunderth goltgulden Item dat er vader uthgaff Godele krech noch dreehunderth goltgulden Pelme krech hunderth goltgulden Noich so koeffte myn vader Hynrick van Drolshagen vele gudes thor Walbecke und Uper geist thor Mathena und koeffte hueshamme myt synen bruytschatte unde koffte den hoff tho hamme sunder dar betaledede he waer an thwue hunderth goltgulden dat ander moeste ich noch uthrichten un betalen hedde de veyde nicht gecomm¹⁰⁾ he hedde dat wall betalet und mer tho gecofft Se nemen uns allet dath wy up erden hedden und jageden myne moder uth der stadt und geven Greven Johanne van der Hoye alle unse semptlike erve und guydt nychtz dar van uth uthgescheiden und wy en behelden nycht eynen voith erden des wy mechtich weren und so weren beyde myn vader unde myn moder verdreven inth seste jaer und mosten ffeneren alle dath se behoveden buthen landes Sunder ick Arndt van Drolshagen was by mynen heren den Mester van Lyfflandt und hadde eyn Ampt tho Segewalde und was dar Masschalick dat vorwarff ick wall Do ick tho huess quam dat ick hadde wall sesteyn hunderdt goltgulden und ick sande mynen vader merkliken vele geldes dar he sick mede behelpen moste Hedde de snoede vrede nycht gecomen he mochte noich villichte geleveth hebben Nu geve em Godt dat ewighe leven dar wy uns alle myth vrolicheit seyn mothen Des will uns unse her Godt gunnen.

¹⁰⁾ Von späterer Hand, wahrscheinlich derselben, welche den oben Anm. 9 erwähnten Zusatz gemacht hat, ist am Rande beigefügt « Zwischen Walram von Moerse so vom Capitel zum Bisschop erwehlet gegen Ericum von der Hoya ».